

Allannguutissatut siunnersuut: Atornerluineq pillugu Inatsisartut Inatsisaat normu xx, xx.xxx.2017-imeersumut.

Akissuteqaat

(Peqqissutsimut Naalakkersuisoq, Agathe Fontain)

Aappassaaneerneqarnera

Naalakkersuisut Ilaqutariinnermut Peqqissutsimullu Ataatsimiititaliaq siunnersuummik sukumiisumik oqaluuserinnissimanerannut aamma isumaliutissiissutaannut qutsavigaat

Naalakkersuisut inatsisissatut siunnersuummut allannguutissanik saqqummiussipput, tassani aalajangersakkat arlaqartut allangortinneqarput Ilaqutariinnermut Peqqissutsimullu Ataatsimiititaliap allangortinneqarnissaat kissaatigalugit isummerfigisimasaat.

Taamaalilluni Allorfimmi siulersuisut katitigaanerat allangortinneqarpoq ilaasortat ikinnerulersillugit aamma qulakkeerneqarpoq atornerluisunik katsorsaasartut siulersuisuni sinniisuutitaqalernissaat.

Qitiusumik aqutsisup ilinniagaqarnerata qaffasissusianut piumasaqaatit qasukkarneqalaarput aamma atornerluisunik katsorsaasartut ilinniagaasa qaffasissusissaannut piumasaqaatit, kiisalu inatsisissatut siunnersuutip taaguutaa allangortinneqarpoq imatut, atornerluinnermut katsorsartinneq atornerluinnermullu ilisimasanut qitiusoqarfik pillugit Inatsisartut Inatsisaat.

Tamakku saniatigut sulisitsisunik ilitsersuinnermut tunngasut atornerluinnermi qitiusumik attaviasut suliarisinnaasai pillugit allannguisoqalaarpoq, kiisalu katsorsartinnissamut innersuuneqartarnermut periutsit allangortinneqarlutik.

Allannguutissatut siunnersuummi inatsisartut inatsisaanni § 29-p allangortinneqarnissaa siunniunneqarpoq, tassa innuttaasut Kalaallit Nunaanni Pinerluttunik Isumaginnittoqarfiup isertitsiviiniittunut atornerluinnermik katsorsartinnermut tunngatillugu.

Naalakkersuisut isumaqarput apeqqut taannarpiaq Ilaqutariinnermut Peqqissutsimullu Ataatsimiititaliami immikkut oqaluuserineqarsimasoq.

Naalakkersuisut eqqumaffigaat allannguutissatut siunnersuummi oqaasertaliornera allaanerusoq isumaliutissiissummi siunnersuutit saqqummiunneqartumut sanilliussilluni.

Naalakkersuisut tamatumani maluginiaquaa aalajangersakkami siunertarineqanngimmat innuttaasut ilaasa atornerluinnermik katsorsarneqarnissamut periarfissaarutsinneqarnissaat. Taamaattumik Kalaallit Nunaanni Pinerluttunik Isumaginnittoqarfiup isertitsiviiniittunut soorunami aammattaaq atornerluinnermut katsorsartinnissamut periarfissaqartinneqassapput.

Aalajangersakkap innuttaasunut Kalaallit Nunaanni Pinerluttulerinnermik Isumaginnittoqarfiup isertitsiviiniittunut katsorsartinnissamut atugassarititaasut sukumiinerusut, Kalaallit Nunaanni Pinerluttunik Isumaginnittoqarfiup aamma Naalakkersuisut akornanni isumaqatigiissutigineqarnissaat qulakkiissavaa.

Taamaattorli isertitsivinniittut katsorsartinnerannut akiliuteqarnissamut pisussaaffik suli erseqqissingilaq.

Taamaattumik aalajangersagaq pisariaqarpoq Kalaallit Nunaanni Pinerluttunik Isumaginnittoqarfiup aamma Naalackersuisut akornanni isumaqatigiissutigineqarnissamik qulakkeerinnittoq, tamatumani qulakkeerneqassammat eqqartuunneqarsimasut atornerluinermik katsorsartinnissamut periarfissaqarnerat.

Apeqqut tamanna pillugu oqallilluarnissaq qulakkeerniarlugu Naalackersuisut taamatut oqaaseqaateqarlutik kajumissaarutigissavaat siunnersuut aappassaaneerinninnerup kingorna Ilaqutariinnermut Peqqissutsimullu Ataatsimiititaliamut suliassiissutigineqassasoq.